

Na osnovu člana 185. Zakona o tržištu vrijednosnih papira ("Službene novine Federacije BiH" broj 85/08, 109/12 i 86/15), člana 62. Zakona o preuzimanju dioničkih društava ("Službene novine Federacije BiH, broj: 77/15), člana 21. Pravilnika o postupanju kod preuzimanja dioničkih društava ("Službene novine Federacije BiH, broj: 81/22), člana 27. Pravila Registra ("Službene novine Federacije BiH, broj: 94/15), i člana 45. tačka 16. Statuta Registra vrijednosnih papira u Federaciji BiH ("Službene novine Federacije BiH, br: 26/09 i 44/11), Nadzorni odbor Registra vrijednosnih papira u Federaciji Bosne i Hercegovine na 93. sjednici održanoj 30.12.2022. godine, na prijedlog Uprave Registra, donio je:

UPUTSTVO

o postupku kod preuzimanja dioničkih društava

I OPŠTE ODREDBE

Član 1.

Ovim Uputstvom o postupku kod preuzimanja dioničkih društava (u daljem tekstu: Uputstvo) uređuju se postupci, načini i rokovi izvršenja poslova i usluga koje obavlja Registar vrijednosnih papira u Federaciji BiH d.d. Sarajevo (u daljem tekstu: Registar) u postupku preuzimanja dioničkih društava.

Član 2.

Postupak kod preuzimanja dioničkih društava Registar obavlja u skladu Zakonom o preuzimanju dioničkih društava (u daljem tekstu: Zakon), Pravilnikom o postupanju kod preuzimanja dioničkih društava (u daljem tekstu: Pravilnik), Pravilima Registra i ovim Uputstvom.

Član 3.

Pojedini pojmovi korišteni u ovom Uputstvu imaju slijedeće značenje:

- a) **ponudilac** je fizičko ili pravno lice koje je u skladu sa Zakonom dužno objaviti ponudu za preuzimanje ili je objavilo namjeru objave ponude za preuzimanje;
- b) **ponuda za preuzimanje** je javno objavljena ponuda, obavezna ili dobrovoljna, upućena svim dioničarima ciljnog društva za sticanje svih dionica sa pravom glasa, uz uslove određene Zakonom, s tim što ponuda može istovremeno biti upućena za sticanje prioriternih dionica bez prava glasa;
- c) **konkurentska ponuda** je ponuda koju treće lice može objaviti samo za vrijeme trajanja ponude za preuzimanje i koja se odnosi na iste dionice ciljnog društva kao i ponuda za preuzimanje;
- d) **izmjenjena ponuda** je ponuda za preuzimanje koju ponudilac može izmjeniti na način da povisi ponudenu cijenu i/ili ponudi veći broj zamjenskih dionica. Kada povisi cijenu ponudilac mora ponudenu cijenu povisiti najmanje za 10%;
- e) **izmjena osnovne/konkurentske ponude** je svaka izmjena već otvorene osnovne ili konkurentske ponude koju ponudilac ili konkurentski ponudilac objavi u skladu sa odredbama Zakona;

- f) **sticalac** je fizičko ili pravno lice koje stiče ili je steklo dionice sa pravom glasa ciljnog društva;
- g) **ciljno društvo** je društvo koje namjerava preuzeti jedno ili više lica u skladu sa Zakonom;
- h) **Registar vrijednosnih papira u Federaciji BiH** d.d. Sarajevo je dioničko društvo kod koga se u skladu sa Zakonom, provodi preuzimanje dioničkih društava;
- i) **Komisija za vrijednosne papire Federacije BiH** je institucija Federacije prema Zakonu o Komisiji za vrijednosne papire

II ZAKLJUČIVANJE UGOVORA O OBAVLJANJU POSLOVA U VEZI SA PREUZIMANJEM DIONIČKIH DUŠTAVA

Član 4.

- (1) Registar će zaključiti ugovor o obavljanju poslova u vezi sa preuzimanjem dioničkih društava sa svakim ponudiocem (fizičko ili pravno lice) koji je obavijestio ciljno društvo, Komisiju za vrijednosne papire Federacije BiH (u daljem tekstu: Komisija), berzu ili drugo uređeno javno tržište i javnost u skladu sa Zakonom, a koji je obavezan objaviti ponudu za preuzimanje ciljnog društva ili objavljuje dobrovoljnu ponudu za preuzimanje.
- (2) U cilju zaključenja, ponudilac je obavezan dostaviti Registru podatke za zaključenje ugovora o obavljanju poslova u vezi sa preuzimanjem dioničkih društava i to:
 - a) fotokopiju obavještenja o nastanku obveze objavljivanja ponude za preuzimanje dostavljenu Komisiji,
 - b) fotokopiju objavljenog obavještenja u dnevnim novinama,
 - c) ovjerena fotokopija identifikacionog dokumenta ako se radi o fizičkoj osobi,
 - d) ovjerena fotokopija identifikacionog dokumenta o osobi ovlaštenoj za zastupanje ili o punomoćniku ako se radi o pravnoj osobi,
 - e) original ili ovjerena fotokopija izvoda iz sudskog registra ili drugog odgovarajućeg registra iz kojeg je vidljiv oblik organizovanja, sjedište i adresa, popis lica ovlaštenih za zastupanje, ne starijih od 30 dana od dana podnošenja zahtjeva, a ukoliko je ponudilac i lice koje s njim djeluje zajednički pravno lice sa sjedištem u inostranstvu prijevod na jedan od službenih jezika u Bosni i Hercegovini po ovlaštenom sudskom tumaču,
 - f) podatke o ponudi koju namjerava objaviti (nacrt integralnog teksta ponude),
 - g) Ugovor ovjeren kod nadležnog organa kojim se uređuju međusobni odnosi ukoliko zajedničkim djelovanjem dva ili više lica suvlasnički stiču dionice,
 - h) Ukoliko ugovorom iz tačke g) ovog stava nije navedeno, potrebno je dostaviti i izjavu ovjerenu od strane nadležnog organa kojom se osobe koje suvlasnički stiču dionice odriču decimalnog ostatka od cijelog broja dionica u korist jedne osobe kada zajedničkim djelovanjem dva ili više lica suvlasnički stiču dionice,
 - i) Potvrdu o broju računa iz banke koji glasi na ponudioca, sa kojeg će ponudilac izvršiti uplatu na račun Registra i na koji će Registar izvršiti eventualni povrat novčanih sredstava.

Član 5.

- (1) Ugovor o obavljanju poslova u vezi sa preuzimanjem dioničkih društava se zaključuje na zahtjev ponudioca ili lica iz člana 3. Pravilnika, a kojima je ponudilac izdao notarski ovjerenu punomoć.
- (2) U slučajevima iz stava (1) ovog člana kada ponudioca (kada ponudilac nije strani državljanin) zastupa advokat ili advokatsko društvu nije potrebna notarski ovjerena punomoć.
- (3) Ugovor o obavljanju poslova u vezi sa preuzimanjem dioničkih društava obavezno sadrži:
 - a) obaveze Registra (radnje i usluge koje Registar obavlja za ponudioca i dioničara koji je prihvatio ponudu za preuzimanje),
 - b) obaveze ponudioca (posebno obaveze koje se odnose na dokumentaciju koja se obavezno dostavlja Registru),
 - c) iznos naknada za postupak preuzimanja te naknade za usluge Registra,
 - d) odgovornost ugovornih strana za obaveze, trajanje ugovora i druge odrebe.
- (4) Registar potpisuje ugovor o obavljanju poslova u vezi sa preuzimanjem dioničkih društava tek kada je utvrđeno da su ispunjeni svi uslovi i dostavljena sva potrebna dokumentacija, te osigurana sva potrebna sredstva za postupak preuzimanja i uplaćena naknada za usluge Registra.
- (5) Ugovor o obavljanju poslova u vezi sa preuzimanjem dioničkih društava zaključuje se pod raskidnim uslovom, pa ako Komisija ne odobri objavljivanje ponude za preuzimanje, ugovor se raskida.
- (6) Uprava Registra će Ugovor o obavljanju poslova u vezi sa preuzimanjem dioničkih društava potpisati u roku od 3 radna dana od dana kada je zaprimljena kompletna dokumentacija, odnosno osigurana sva potrebna sredstva.
- (7) Zajedno sa potpisanim Ugovorom Registar ponudiocu dostavlja obrasce NP1, NP2, NP3, NP4 kao i upute o ispravci podataka vlasnika.
- (8) Ponudilac je dužan Registru dostaviti obrasce NP1 i NP4.

Član 6.

Registar će ponudiocu izdati potvrdu da su osigurana sredstva za preuzimanje svih dionica koje su predmet ponude za preuzimanje.

III OSIGURANJE NAKNADE

Član 7.

- (1) Prije zaključenja ugovora o obavljanju poslova u vezi sa preuzimanjem dioničkih društava, pored ostale dokumentacije iz člana 4. ovog Uputstva, ponudilac je obavezan osigurati naknadu za preuzimanje svih dionica koje su predmet ponude za preuzimanje.

- (2) Radi osiguranja naknade, ponudilac je obavezan:
- a) na namjenski račun Registra uplatiti novčana sredstva, ili
 - b) dostaviti Registru bezuslovnu, neopozivu i na prvi poziv plativu bankarsku garanciju na ime Registra, a u korist dioničara, ili
 - c) dio sredstava uplatiti na namjenski račun Registra, a za preostali dio dostaviti bezuslovnu, neopozivu i na prvi poziv plativu bankarsku garanciju na ime Registra, a u korist dioničara, ili
 - d) deponovati dovoljnu količinu zamjenskih dionica odgovarajuće tržišne vrijednosti na poseban račun kod Registra, ili
 - e) deponovati zamjenske dionice i za preostali dio uplatiti novčana sredstva ili dostaviti bezuslovnu, neopozivu i na prvi poziv plativu bankarsku garanciju na ime Registra, a u korist dioničara.

Član 8.

- (1) Rok važenja bankarske garancije koju ponudilac dostavlja Registru ne može biti kraći od 120 dana od dana izdavanja i uz mogućnost da se isti produži, obzirom da rok važenja bankarske garancije ne može biti kraći od 15 dana od posljednjeg dana roka za plaćanje dionica.
- (2) Na zahtjev Registra, ponudilac je obavezan produžiti rok važenja bankarske garancije ili uplatiti novčana sredstva na namjenski račun Registra.
- (3) Ukoliko ponudilac ne postupi po zahtjevu Registra u ostavljenom roku, Registar će aktivirati bankarsku garanciju u iznosu potrebnom za plaćanje svih dionica koje su predmet ponude za preuzimanje.

Član 9.

- (1) Registar će ponudiocu, nakon nastanka obveze objavljivanja ponude za preuzimanje, na njegov pismeni zahtjev omogućiti uvid u podatke koji se odnose na dioničare i dionice ciljnog društva koji se vode kod Registra.
- (2) Uz zahtjev ponudilac je obavezan dostaviti Registru ili javno objavljenu obavijest o sticanju određenog broja dionica s pravom glasa ili javno objavljenu namjeru objave ponude za preuzimanje.
- (3) Uvid podrazumjeva podatke o dioničarima i to: ime, prezime i adresu, te podatke o broju dionica koje se odnose na ciljno društvo.
- (4) Registar će ponudiocu na njegov pismeni zahtjev izdati izvještaj sa naprijed navedenim podacima.
- (5) Registar će ponudiocu nakon zaključenja ugovora izdati Izvještaj o upisanim ograničenjima na dionicama ciljnog društva sa stanjem na dan zaključenja ugovora. Ponudilac može na

pisani zahtjev zatražiti od Registra Izvještaj o upisanim ograničenjima na dionicama na tačno određeni dan u roku trajanja ponude za preuzimanje.

IV POKRETANJE POSTUPKA PREUZIMANJE

Član 10.

- (1) Nakon zaključivanja ugovora sa Registrom, najkasnije narednog dana od prijema rješenja Komisije, ponudilac podnosi Registru:
 - a) rješenje Komisije kojim se odobrava objavljivanje ponude za preuzimanje ciljnog društva,
 - b) kompletnu ponudu u skladu sa članom 27. stav 3. Zakona.
- (2) Najkasnije narednog radnog dana od dana objava ponude za preuzimanje iz člana 7. stav 1. Zakona, ponudilac podnosi Registru nalog za otvaranje ponude za preuzimanje ciljnog društva (NP1) uz koji obavezno dostavlja i kopije objava u dnevnim novinama ponude za preuzimanje.
- (3) Nalog za otvaranje ponude za preuzimanje ciljnog društva obavezno sadrži podatke o ponudiocu, ciljnom društvu i o ponudi.
- (4) Obrazac naloga (NP1) je utvrđen u prilogu 1. koji čini sastavni dio ovog Uputstva.

Član 11.

- (1) Podaci o ponudi za preuzimanje upisuju se u informacijski sistem Registra (CSD), najkasnije u roku od jednog radnog dana od dana dostave urednog naloga (NP1) i uredne prateće dokumentacije.
- (2) Danom unosa podataka iz naloga (NP1) o pokretanju postupka preuzimanja, Registar dodjeljuje ponudi poziv na broj, koji se koristi u svim pismenima i novčanim naložima vezanim uz ponudu za preuzimanje.

Član 12.

Rok trajanja ponude za preuzimanje računa se saglasno članu 28. Zakona.

Član 13.

Registar će odmah po dostavljanju obavijesti ciljnog društva o sadržaju ponude za preuzimanje istu objaviti na web stranici Registra.

V IZMJENA PONUDE ZA PREUZIMANJE

Član 14.

- (1) Ukoliko Komisija ponudiocu odobri povećanje ponuđene cijene u ponudi za preuzimanje, ponudilac će bez odlaganja dostaviti Registru:
 - a) nalog NP4,

- b) rješenje Komisije kojim se odobrava povećanje ponuđene cijene u ponudi za preuzimanje,
 - c) fotokopiju izmjene ponude za preuzimanje objavljenu u dnevnim novinama,
- (2) Zbog povećanja ponuđene cijene, ponudilac je bez odlaganja obavezan osigurati naknadu kako je definisano u članu 7. ovog Uputstva.

Član 15.

Izmjena podataka o ponudi unosi se u informacioni sistem (CSD) Registra, najkasnije u roku od jednog radnog dana od dana dostave urednog naloga NP4, pod uslovom da je izmjena ponude za preuzimanje (povećanje cijene) javno objavljena i da je Registar o tome obaviješten dostavom fotokopije iste.

VI PRIHVATANJE PONUDE ZA PREUZIMANJE

Član 16.

- (1) Dioničari koji žele prihvatiti ponudu, trebaju najkasnije do isteka roka važenja ponude predati Registru:
- a) pisani nalog (NP2) za prihvatanje ponude koji je ovjeren od strane notara, kao i
 - b) potvrdu o broju transakcijskog računa vlasnika sa uključenim jednim od identifikacionih podataka vlasnika (JMB ili broj osobne iskaznice/lične karte), a koja je ovjerena od strane banke iz BiH.
- (2) Nalog za prihvatanje ponude moguće je dostaviti neposredno Registru ili putem pošte.
- (3) Potpis nalogodavca/dioničara ili punomoćnika na nalogu mora biti ovjeren od strane notara, osim u slučaju kada je punomoćnik advokat ili advokatsko društvo.
- (4) Ako se nalog za prihvatanje ponude upućuje poštom, isti mora biti predat na poštu najkasnije zadnji dan roka važenja ponude, a zaprimljen u Registru najkasnije naredni dan.
- (5) Uslov za provodivost i urednost naloga je da podaci o vlasniku vrijednosnih papira registrirani u informacionom sistemu Registra (CSD) odgovaraju podacima upisanim u nalogu NP2 i da je količina dionica registrovana na registarskom računu, osim ako su dionice upisane na skrbničkom računu, kada prihvatanje ponude obavlja skrbnik.
- (6) Ukoliko se pregledom naloga NP2 koji su pristigli poštom utvrdi da podaci vlasnika ne odgovaraju podacima upisanim u informacionom sistemu Registra (CSD), ovlašteni zaposlenik Registra će putem telefona dati upute za ispravku podataka i uputiti pismenu obavijest o načinu otklanjanja nedostataka.
- (7) Ukoliko Registar zaprimi nalog za ispravku podataka nakon isteka roka trajanja ponude za preuzimanje, isti će se smatrati neurednim te neće biti obrađen.

Član 17.

- (1) Ovlašteni zaposlenik Registra provjerava podatke dioničara koji prihvata ponudu iz naloga NP2/NP3, sa podacima u informacionom sistemu Registra (CSD).
- (2) Ukoliko se neki od podataka ne slažu, dioničar dostavlja Registru zahtjev za korekciju podataka kako bi se isti usaglasili sa podacima u informacionom sistemu Registra (CSD).

Član 18.

Ukoliko se dionice, za koje dioničar prihvata ponudu nalaze na klijentskom računu člana sistema Registra, Registar će po nalogu vlasnika iste prenijeti na registarski račun kako bi se mogle deponovati.

Član 19.

- (1) Nalog za prihvatanje ponude sadrži podatke o emitentu, ponudi za preuzimanje i ponudiocu, dioničaru, oznaci i količini dionica za deponovanje, te potpis dioničara, odnosno njegovog punomoćnika.
- (2) Sastavnim dijelom naloga za prihvatanje ponude za preuzimanje smatra se i ovlaštenje Registru da u ime i za račun dioničara uputi pisani poziv za plaćanje na osnovu bankarske garancije.
- (3) Za tačnost i ispravnost podataka navedenih u nalogu za prihvatanje ponude odgovara dioničar.

Član 20.

Obrazac naloga za prihvatanje ponude (NP2) utvrđen je u prilogu broj 2. koji čini sastavni dio ovog Uputstva.

Član 21.

- (1) Na osnovu urednih i provodivih naloga, u informacioni sistem Registra (CSD) se unosi prihvatanje ponude i dionice za prihvatanje ponude se deponuju na poseban račun za preuzimanje.
- (2) Sa dionicima koje se nalaze na računu za preuzimanje ne može raspolagati ni osoba koja ih je deponovala niti ponudilac, osim u slučajevima povlačenja prihvata ponude za preuzimanje.

VII POVLAČENJE PONUDE ZA PREUZIMANJE

Član 22.

- (1) Dioničar može sve do isteka roka ponude povući svoj nalog o prihvatanju ponude, tako da dostavi Registru uredno popunjen nalog (NP3) za povlačenje dionica sa računa za deponovanje kod Registra na račun dioničara kod Registra, ovjeren od strane notara.

- (2) Obrazac naloga za povlačenje ponude za preuzimanje (NP3) utvrđen je u prilogu broj 3. koji čini sastavni dio ovog Uputstva.

Član 23.

- (1) Ako ponudilac povuče ponudu za preuzimanje zbog konkurentske ponude za preuzimanje po višoj cijeni ili zbog stečaja ciljnog društva, obavezan je najkasnije narednog dana od donošenja odluke o povlačenju obavijestiti Registar, te dostaviti nalog (NP4) za povlačenje ponude.
- (2) Povlačenje ponude unosi se u informacijski sistem Registra (CSD) u roku od 5 radnih dana od dana dostave urednog naloga NP4 pod uslovom da je povlačenje ponude javno objavljeno u dnevnim novinama saglasno roku iz Zakona, o čemu je Registar uredno obaviješten dostavljanjem kopije objavljene obavijesti.
- (3) Nakon unosa povlačenja ponude, Registar će izvršiti prijenos deponovanih dionica na račun prije prihvata ponude i izvršiti povrat zamjenskih dionica, deponovanog novca umanjenog za troškove Registra ili na prvi poziv plative bankarske garancije na ime Registra, a u korist dioničara.

VIII INFORMISANJE

Član 24.

U toku trajanja ponude za preuzimanje Registar na svojoj internet stranici dnevno objavljuje podatke o broju deponovanih dionica u apsolutnom iznosu u odnosu na ukupan broj dionica sa pravom glasa.

IX ZATVARANJE PONUDE I IZVJEŠTAJ O PREUZIMANJU

Član 25.

- (1) Registar ponudu zatvara nakon isteka Zakonom određenog roka, obrade svih urednih naloga i rješavanja eventualnih spornih momenata ponude sa ponudiocem.
- (2) Zatvaranjem ponude, Registar će sačiniti izvještaj o preuzimanju te isti dostaviti Komisiji, ponudiocu, ciljnom društvu, berzi i drugom uređenom javnom tržištu na koje su uvrštene u trgovanje dionice ciljnog društva najkasnije narednog radnog dana od dana isteka roka za plaćanje dionica koje su predmet ponude za preuzimanje.
- (3) Sadržaj izvještaja je određen Zakonom.

X ISPLATA DIONIČARA I PRENOS DIONICA

Član 26.

- (1) Registar će dioničarima izvršiti isplatu novčanih sredstava za deponovane dionice u zakonskom roku.

- (2) Prijenos novčanih sredstava se vrši sa namjenskog računa Registra na kome su izdvojena novčana sredstva za isplatu deponovanih dionica, na račune dioničara koji su prihvatili ponudu za preuzimanje ili izuzetno na račun punomoćnika-advokata koji su zakonom ovlašteni da primaju novčana sredstva svojih klijenata, te vrše prijenos istih u skladu sa zakonom i drugim propisima kojima se reguliše devizno poslovanje i prijenos novčanih sredstava.
- (3) Kada ponudilac povećava ponuđenu cijenu u toku trajanja postupka preuzimanja, Registar vrši obračun novčanog iznosa za isplatu dioničarima po novoj, većoj cijeni.

Član 27.

- (1) Ako je naknada za preuzimanje dionica koje su predmet ponude osigurana na prvi poziv plativom bankarskom garancijom na ime Registra, a u korist dioničara, ponudilac je dužan uplatiti potreban iznos sredstava na namjenski račun Registra najkasnije dva radna dana nakon isteka roka trajanja ponude uz obavezan poziv na broj ponude za preuzimanje. Ukoliko ponudilac nije izvršio plaćanje u predviđenom roku, Registar će aktivirati garanciju slanjem pisanog poziva na plaćanje.
- (2) Ako je ponudilac samo djelimično uplatio novčana sredstva za isplatu dioničarima do propisanog roka, garancija će se aktivirati za onaj iznos koji nije uplaćen.

Član 28.

Registar će izvršiti prijenos dionica na račun dioničara na način i u skladu sa Zakonom, ako je naknada za preuzimanje dionica koje su predmet ponude osigurana zamjenskim dionicama, koje je ponudilac deponovao na poseban račun kod Registra.

Član 29.

- (1) Registar će izvršiti prijenos deponovanih dionica na ponudioca najkasnije narednog radnog dana od dana prijema rješenja Komisije o uspješnosti preuzimanja.
- (2) Ukoliko u ponudi za preuzimanje, osim ponudioca dionice stiču i osobe koje zajednički djeluju sa ponudiocem, sa vlasničkog računa ponudioca prenosi se pripadajući dio dionica na vlasničke račune osoba koja s njim djeluju zajednički, na način kako su isti definisali svojim ugovorom/sporazumom.

Član 30.

Registar ponudiocu dostavlja obavijest o izvršenom prijenosu dionica po predmetnoj ponudi.

XI POSTUPANJE KOD OPTEREĆENIH DIONICA CILJNOG DRUŠTVA

Član 31.

Ako je ponudilac u ponudi naveo da će kupiti i dionice ciljnog društva na kojima je zasnovana neka vrsta opterećenja, odnosno ograničenja (založno pravo, prava trećih lica na vrijednosnim papirima, pljenidbe, mjere osiguranja, privremene mjere i drugi tereti), takve

dionice se mogu deponovati ako dioničar u periodu trajanja ponude za preuzimanje u Registru provede postupak brisanja zasnovanog opterećenja/ograničenja i istovremenog novog upisa opterećenja na ponudioca, uz pisanu saglasnost lica u čiju korist, odnosno po čijoj je odluci ili nalogu zasnovano opterećenje/ograničenje, s tim da se saglasnost pravnog lica ovjerava pečatom tog lica, a saglasnost fizičkog lica se ovjerava kod notara.

Član 32.

Ako je ponudilac u ponudi naveo da će kupiti dionice na kojima je zasnovano opterećenje/zabrana raspolaganja na osnovu odredbi Zakona o tržištu vrijednosnih papira koje se odnose na sticanje dionica u određenim vrstama emisija, takve dionice se mogu deponovati ako dioničar u periodu trajanja ponude, prethodno, u Registru provede postupak brisanja zasnovanog tereta.

XII POSTUPANJE KOD USLOVLJENE PONUDE ZA PREUZIMANJE

Član 33.

Kada je ponuda za preuzimanje uslovljena u skladu sa članom 23. stav 3. Zakona (dostizanje određenog praga uspješnosti ponude) i ako u ponudi nije deponovano dovoljan broj dionica, Registar će preduzeti slijedeće:

- a) obavijestiti svakog dioničara koji je prihvatio ponudu;
- b) obavijestiti o tome kao i o ukupnom broju deponovanih dionica Komisiju, berzu, ciljno društvo i ponudioca;
- c) izvršiti vraćanje dionica sa računa za deponovanje na račune vlasnika,
- d) izvršiti povrat novčanih sredstava umanjeno za troškove Registra.

XIII PRAVO PRIJENOSA DIONICA MANJINSKIH DIONIČARA

Član 34.

(1) Ponudilac ili njegov punomoćnik ima pravo Registru podnijeti zahtjev za prijenos dionica sa pravom glasa ili prioritetnih dionica manjinskih dioničara, uz pravičnu naknadu, pod slijedećim uslovima:

- a) da je u ponudi za preuzimanje naveo da će koristiti ovo pravo;
- b) da nakon ponude za preuzimanje, ponudilac i lica koja s njim djeluju zajednički drže najmanje 95% dionica s pravom glasa ili prioritetnih dionica;
- c) da zahtjev podnese najkasnije u roku od tri mjeseca od isteka roka trajanja ponude za preuzimanje,
- d) da podnese dokaz o osiguranju naknade za prijenos vrijednosnih papira i osiguranju drugih troškova u vezi sa prijenosom dionica manjinskih dioničara,
- e) da dostavi od strane nadležnog organa ovjerenu pisanu izjavu kao dokaz da je obavijestio manjinske dioničare sa liste dioničara u skladu sa članom 19. Pravilnika,
- f) da dostavi fotokopiju obavijesti ciljnom društvu, berzi ili drugom uređenom tržištu i Komisiji,
- g) da dostavi Rješenje Komisije kojim je odobrena ponuda za preuzimanje i odobrena visina pravične naknade za dionice koje se prenose na ponudioca u postupku prijenosa dionica manjinskih dioničara.

- (2) Prijenos dionica manjinskih dioničara će se provesti po cijeni koja je utvrđena u rješenju Komisije iz stava (1) tačka h) ovog člana.

Član 35.

- (1) Manjinskim dioničarima čije su dionice predmet prava prijenosa dionica, a na kojima je zasnovana neka vrsta opterećenja, odnosno ograničenja (založno pravo, prava trećih lica na vrijednosnim papirima, pljenidbe, mjere osiguranja, privremene mjere i drugi tereti), takve dionice se prenose na ponudioca samo ukoliko se prethodno u Registru, u skladu sa važećim propisima, provede postupak brisanja zasnovanog opterećenja/ograničenja uz pisanu saglasnost lica u čiju je korist, odnosno po čijoj je odluci ili nalogu zasnovano opterećenje/ograničenje. U slučaju da se ne provede postupak brisanja, Registar će cjelokupan postupak prijenosa dionica manjinskih dioničara provesti na račun ponudioca samo za slobodno prenosive dionice.
- (2) Manjinskim dioničarima čije su dionice predmet prava prijenosa dionica manjinskih dioničara i koje su prenesene na račun ponudioca u skladu sa Zakonom i Pravilnikom, Registar će izvršiti prijenos novčanih sredstava sa računa za posebnu namjenu na račune dioničara, ili izuzetno na račun punomoćnika-advokata koji su zakonom ovlašteni da primaju novčana sredstva svojih klijenata, te vrše prijenos istih u skladu sa zakonom i drugim propisima kojima se reguliše devizno poslovanje i prijenos novčanih sredstava na način i postupku definisanom članom 45. stav 7. Zakona i članom 17. Pravilnika.
- (3) Radi osiguranja naknade iz prethodnog stava, ponudilac je dužan na namjenski račun Registra izdvojiti novčana sredstva u korist manjinskih dioničara na iznos potreban za plaćanje svih slobodno prenosivih dionica manjinskih dioničara u skladu sa Zakonom i Pravilnikom.
- (4) Registar će obavijestiti Komisiju nakon završetka postupka prijenosa dionica manjinskih dioničara.

Član 36.

Namjenski račun je račun koji kod banke otvara Registar, na koji se prenose novčana sredstva namijenjena za plaćanje dionica koje se predmet isplate manjinskih dioničara.

Član 37.

- (1) Prijenos novčanih sredstava koja su pripala ostaviocu po osnovu isplate dionica manjinskih dioničara vrši se u skladu sa pravosnažnim rješenjem o nasljeđivanju, ukoliko su novčana sredstva dio ostavinske mase ili ako je u rješenju o nasljeđivanju naveden broj dionica ciljnog društva koje je ostavilac posjedovao na dan prijenosa dionica na ponudioca.
- (2) Sve troškove u vezi s prijenosom dionica manjinskih dioničara snosi ponudilac, u skladu sa Zakonom.

Član 38.

Registar vodi računa da svaki od nasljednika dobije novčani iznos proporcionalan broju dionica koje je naslijedio u skladu sa rješenjem o nasljeđivanju, osim razlika koje su neophodne radi zaokruživanja iznosa na dvije decimale.

XIV PRAVO PRODAJE DIONICA MANJINSKIH DIONIČARA

Član 39.

Pravo prodaje dionica manjinskih dioničara obavlja se u skladu sa članom 46. Zakona, člana 20. Pravilnika, te članovima 35. do 39. ovog Uputstva.

XV KONKURENTSKA I IZMIJENJENA PONUDA

Član 40.

Odrebe ovog Uputstva shodno se primjenjuju i u slučaju podnošenja konkurentske ponude i izmjenu već otvorene osnovne ili konkurentske ponude, osim što se u slučaju izmjena već otvorene ili konkurentske ponude ne primjenjuju odredbe o zaključivanju ugovora sa Registrom.

Član 41.

Stupanjem na snagu ovog Uputstva prestaje važiti Uputstvo o postupku kod preuzimanja dioničkih društava broj: 01-3-NO- 36-793/16 od 19.01.2016. godine i Uputstvo o izmjenama i dopunama Uputstva o postupku kod preuzimanja dioničkih društava broj: 01-3-NO- 48-8410/17 od 01.08.2017. godine te Uputstvo o postupku kod preuzimanja dioničkih društava br. 01-3-NO-90-9542/22 od 10.11.2022. godine.

Član 42.

- (1) Ovo uputstvo stupa na snagu danom izdavanja saglasnosti Komisije za vrijednosne papire Federacije Bosne i Hercegovine.
- (2) Uputstvo se objavljuje na web stranici Registra : www.rvp.ba .

Broj: 01-3-NO-93-10972/22
Sarajevo, 30.12.2022. godine

Predsjednik
Nadzornog odbora

Emina Sarač s.r.

Na ovo Uputstvo o postupku kod preuzimanja dioničkih društava, Komisija za vrijednosne papire Federacije BiH, dala je saglasnost rješenjem, broj: 04/3-19-265/22 od 19.01.2023.godine.

Prilozi uz ovo Uputstvo:

- Obrazac naloga za otvaranje ponude NP1;
- Obrazac naloga za prihvatanje ponude NP2;
- Obrazac naloga za povlačenje prihvata ponude NP3;
- Obrazac naloga za izmjenu ponude za preuzimanje NP4;